


# Meis piz: Piz Ajüz

DAD ANNATINA FILLI/FMR

■ La damaun cun star si, durant il di u la saira cun ir en letg: El guarda adina en da fanestra, il Piz Ajüz. Tut tenor il punct da vista e co ins tegna il chau – e cun ina purziun buna fantasia – ves’ins l’abitant marcant dal Piz Ajüz: Il chau dad in «capuriun», in capo-indian, cun ses ornament da plimas, e quel «capuriun» fa gist la pausa.

Il Piz Ajüz stat sa chapescha en la sumbriva da ses enconuschent vischin, il Piz Lischana, il qual ha perfin ina chamona dal Club alpin svizzer numnà tenor el. Ensemen fan els part da la gruppa dal Lischana che cunfina cun ils auals Clemgia ed Uina. Ma era giu dal Piz Ajüz ramplunan adina puspè bovas, e cun in pau fortuna pon ins perfin las observar, era senza perspectiv.

La Val Triazza cun ses aual ch’ha sia funtauna en la regiun dal Piz Ajüz ha procurà tar las malauras dals onns 2015 e 2017 per donns considerabels en il cumünet da Pradella, situà pauc davent da Scuol. Durant ils onns da quellas bovas era perfin vegnida pustada sut Pradella ina maschina da fabrica per rumir davent



cuntinuadamain il material che la Val Triazza purtava aval. Mo al «capuriun» dal Piz Ajüz paran bovas, auals furius e ramplunim da disturbar pauc: El fa la pausa.

## Cifras e fatgs:

Num:	Piz Ajüz
Autezza:	2788 m s.m.
Ascensiun:	Davent dal parcadi da la Chamonna Lischana en vischinanza da San Jon, vers la Val Triazza, lung la senda sur la furcla. Durada circa set uras.

